


En memoria da

4.7.80

Alfred Decurtins-Beer, Sedrun



La veta e la mort, savens ein maneivel
Con greva la sort, pil human nuncapeivel.

Quels patratgs havein nus stuiu far il venderdis, ils 20 da zercladur 1980, udend a tuccond da miert per nies preziau convischin Alfred Decurtins. Bein fa ei mal a nus humans cu la mort taglia ligioms carschi e s'enfirmi atras onns e decennis, ligioms ferms e caulds. Mo nossa cardient-scha dat a nus confiert, curascha e speranza, la speranza dil seveser. — Nus lein schar passar avon nos egls il car defunct e seregurdar a siu variont viadi terrester en nies miez, en nossa val, cun profundas e fermas ragischs.

Alfred Decurtins ei naschius ils 9 da mars 1915 sco fegl dil nunemblideivel hotelier, president communal e depautau Hans Giachen Decurtins e Luisa, nata Agosti. Sco secund vegl eis el carschius si el ravugl da sis fargliuns. El ei staus adina e dapertut propri in fegl da Tujetsch, da ses cuolms e sias pistas. Il temps d'affonza ha el passentau a Sedrun en semplas e modestas relaziuns. Quellas ha el denton mai emblidau e carezau entochen sia mort. Suenter haver frequentau las scolas popularas da Tujetsch, sedecida il giuven da sescolar vinavon e seprepara per la veta cun in studi mercantil a Cuera. Silsuenter serenda el a Lucerna per absolver la scola d'ustiers. Turnaus a Tujetsch, gida el nua ch'ei fa basegns el hotel Alpsu e s'occupescha dasperas empauet cun l'agricultura da siu bab.

Ualti spert encorscha il defunct che la sparta da sport e turissem savessi daventat attractiva ed interessanta per la proxima generazion. Il brevet da scolast da skis e la patenta da guid da muntogna che el ha acquistau ein franc stai decisivs per il grond ed impurtont uffeci ch'igl Alfred ha exequiu sco cau-menaschi dils indrezs da skis en nossa val e quei duront 17 onns. — Igl onn 1949 ha igl Alfred serrau la lètg cun la giuvna Maria Barla Beer, da Sedrun, ina ligia che ei daventada tgina per dus buobs e duas buobas. La famiglia ha il defunct teniu aschi car sco la poppa digl egl. In onn suenter la maridaglia ha il giuven pèr surpriu il hotel dalla Cruna a Glion, ch'els han menau duront 3 onns. Silsuenter diregian els il menaschi dil restaurant «Krüzelipass» e quei per in decenni.

Il temps da construziun dils implots dallas auas en Tujetsch sepresta cun grondas lavurs pils avdouts da Tujetsch. Alfred cumpra in camiun e separticipescha ad in consorzi. L'entira populaziun da Tujetsch profiteschia dil svilup economic. In dils emprems iniziants per la fundaziun d'ina societad da runals ei nies car defunct staus. Igl onn 1963 surren el — sco emprem — la plaza da cau-menaschi. Leu ha el veramein impundiu sias enconuschientschas professiunalas e sias forzas cun bia engaschi e cun grond success per nossa populaziun. Igl Alfred udeva tier il maletg dil Tujetsch turistic sco il sal tier la spisa. Cun prudentscha, buontad e carezia ha el dirigiu igl entir menaschi per cumpleina cumentient-scha da luvrers, hospes ed indigens. Per quei grond engaschi seigi engraziau ad el sinceramein. Tier la davosa radunanza generala dalla societad da runals Sedrun-Rueras SA ha il president, Leci Jacomet, regalau al preziau defunct ina bial'ura sco renconuschientscha ed engraziament pil prestau. Tgi havess sminau lezza sera che gest en in meins pli tard vegnien las restonzas terrestras dil car defunct surdadas allà fossa.

El temps liber preferiva igl Alfred oravontut il dar jass. Cun ardiment ed ina certa piissiu spetgava el vess sin la fin dall'jamna per saver passentar zacontas uras cun ses amitgs jassists en legra cumpignia. Quei era siu delelg e cheu encureva el il contact cul concarstgaun. Igl Alfred ei era staus in dils confundaturs dalla Uniu da catschadurs Badus, Tujetsch, che ei vegnida fundada igl onn 1943. Biars onns eis el ius a catscha aulta e bassa ed era aunc a pesca. El ha adina encuretg il contact cun la natira.

Cun nies defunct Alfred va in um allert, capavel e fidau a nostra val naven da nus. Memia baul ha la maligna malsogna suatiu el e consumau sias forzas. Cun la reservadad dad in carstgaun cartent e senza canera ha el dau al Scaffider sia veta senza serebalzar e bein resignaus en la veglia da Diu. — Igl impressiunont til da bara ha mussau claramein con enconuschents e carezaus ch'il car defunct era alla populaziun da Tujetsch, a hospes, amitgs ed enconuschents d'ordvart. Tuts quels han — cun lur preschientscha dau al defunct la davosa duida honur. — Allas famiglias en malencurada lessel jeu admetter cordiala condolenza. Car Alfred, ru-aussa en la pasch dil Segner! N.V.